

四庫全書

集部

欽定四庫全書

集部

彭城集卷九至十二

詳校官庶吉士臣馬履泰

檢討臣何思鈞覆勘

總校官進士臣程嘉謨

校對官編修臣朱紱

謄錄監生臣鍾拔元

欽定四庫全書

彭城集卷九

宋 劉敞 撰

五言律詩

庵嶺漁叟詩

有序 原注
時年十四

庵嶺高數十百仞其下有溪才深五六尺左右
多樹木自高望之謂非人居有叟乘短舫釣罩
于其中予甚嘉焉贈以此詩

溪叟厭塵網移家臨水居開扉對山色堰水活嘉魚蓬
棹自相得笑歌還自如猶嫌子陵傲老更就蒲車

道人申演

先生隱君子暮齒寄山林蒼鶴齊筋力清泉漱語音衣
冠猶似俗心事獨非今歸去我蜀路千峯何處尋

幽居

住處必松竹經年長自閒青苔仍有徑亂石更成山飲
水却餘樂荷鋤誰愧顏悠然謝車馬聽客到門還

小雨

微雲興縹緲疎雨過森陰潤積衣裳膩涼生戶牖深塵埃聊洗眼宇宙快開襟寂寞城闌暮歸飛見水禽好風隨細雨蕭颯過吾廬野興鋤瓜後衡門隱几初積陰生綠縹清氣襲空虛耳目遺塵土還當讀我書

宿雲留暝色細雨逼殘春芳樹看紅濕垂楊亦翠蟬高風吹燕翼定水漲魚鱗漸恐年華改桃源憶晉人

立春

得新矜白鬢數九喜和風
菜甲成春事郊園付野翁
天開池水碧雪盡樹梢紅
頗復尋樵隱柴門步武通

挽故相國尚書令忠獻公

四轉更注意兩朝公受遺
大明開日月全德冠臯夔
已悟騎箕事猶餘罷市悲
太常難紀績天語詔豐碑

意氣萬夫望衣冠八尺身
有為悲鳳鳥不作畫麒麟
餘烈周宗近英威漢相真
召棠終勿翦畫錦仰鄉人

殄瘁虛人望哀榮備寵章
疇功蕭相國異數郭汾陽
鼎

實宵無味階星畫隕光惟應文考廟萬歲共烝嘗

曾魯公挽詩

扶陽詩禮樂丞相始安車世祚公之魯門風行在書三
朝推帝賚九叙見民餘古有騎箕事今知定不虛

雲臺存畫像卑陋想遺風文彩階符在儀型嶽鎮空考
終方備福言念始為忠今日緇衣美能明善善功

南公工說識故老筆通靈本自符千運宜然享百齡高
高雄作鎮河潤溢為榮考卜佳城處無須石槨銘

蘇國公主挽詩

湯沐侯家貴山林主第開
天孫烏鵲水蕭史鳳凰臺
遇事悲風燭新阡愴劫灰
清秋降北渚不奈楚聲哀

秋園晚步

慘慘高秋興蕭蕭欲暮天
地荒逢敗葉日下聽殘蟬
感物偏無賴悲秋私自憐
如今已如此何待二毛年
搖落西風早蒼茫晚日斜
木蘭休紫艷籬菊委黃花
興似陶潛賦愁如庾信家
向來吟思苦直恐鬢霜華

晚步

日沒城陰合人歸草露涼
淺池宜短艇高樹倚胡床
清嘯激秋氣孤吟留月光
敢言吾獨善魚鳥正相忘

城西晚歸南山馬上口占

塵土辜雙眼驅馳損壯顏
夕陽銜遠樹馬首看南山
應接都忘倦神明自覺還
無心非自強最識白雲間

便風掛帆欣然有作

泛梗江流疾轉蓬風力強
天時周必復吾道不終藏
白

鶴先余路飛鳥送客櫓掛帆資隱几北走萬山蒼

巢湖

天與水相通舟行去不窮無人能縮地何術可分風宿霧
凝深黑朝曦浴嫩紅四山千里遠晴晦已難同

晨至後園

白露晨已重晚花秋正繁城陰到少息林下寂無喧圃
老能呼鶴樵奴競戲猿山林何異此機事復誰存

寄范佑之

徽宗隨武後相與亦通家望氣如豐劔聞名省渥洼將
門嚴檠戟王略盡流沙好取封侯印誰能讀五車

寄和父

原註時自宋
之任越州

行李資章甫秋期看海濤埃塵乍振袂淮泗幸容舫
鷗雙鳬健飛鳥五兩高須君酌花酒慰此寸心勞

寄楊十七

原註楊有詩道和父蕭山政善作此
報之楊詩所稱說三事故首句及之

宰邑成三異吾兄復妙年長愁越聲短不似古詩傳高
唱今獨步知音深謂然還疑剡溪上紙貴幾多錢

寄梅聖俞

獨騎驚馬出強逐衆人行
貧始怨寡與老仍畏後生
吾子忘年友新詩獨步名
秋風夢無限時過許昌城

寄王深甫

箕穎多奇士他年洗耳翁
古人皆直道吾子嗣高風
解榻迎徐孺名鄉禮鄭公
正憐賢太守心賞與人同

寄隱直

遠身嗟道敝築室笑勞生
應接知儕俗浮沈得避名
陳

家星不昧灌氏水長清往事今閭里悠悠旅客情

洞庭寄張四

壤俗三苗舊湖波八月寒天形漸水近秋氣逼楓丹漠

漠萍號雨瀟瀟澧有蘭東流無限水一洗故入冠

原注
時聞

隱五

欲仕

滑州罷為白馬縣舍弟司法省歸寄此詩

散軍收檠戟改邑壯三畿太守朝行在諸曹自免歸大
河終北注旅鴈獨南飛遲爾寬相憶他時信息稀

送韓太祝罷官歸許昌觀

吏課三年最歸裝五日糧朋情惜分散予舍想輝光泉
潔湖波白春融柳帶黃因君老萊戲遙奉使君觴

自江南將歸先寄和甫

五湖休作客八月去乘槎天地凝秋日山川照落霞寄
聲西道主好在嗣宗家盛醢重陽酒登高飲菊花
狂直非儕俗文章念及門無成似馮衍失路比虞翻抱
甕機先息書空事不言江南香草地一賦荃蓀

風雨寄張野人

宿雨萍號苦淒風虎嘯頻
喜開蟲豸蟄悵阻物華春
雞呌思君子鶯遷憶故人
泥塗塞車轍相過獨無因

寄張六

十里一反顧去君垂五千
遠身卑濕地歸意沈寥天
南極多來鴈秋陰減跼爲
寄書江漢水好送北歸船

寄張宜

屈指張生老無人事隱淪
鯨魚空自飽章甫向誰親
丹

荔充庭實明珠逐賈人如何滄海上瓶石一生貧

寄張六

君為棄官去豪氣故風流無復池中物真能方外遊
浮生都物變衰俗使人愁聞有桃源路歸來試力求

省中寄王平甫

簿領禿千兔馬中強一食未為勤事吏空負寫書官
奇獸名天祿層樓近并幹林花今正盛夢想月邊寒

重寄蘇子瞻

空冒述舊學華髮悵頽齡江海容孤翼雲霄寄客星未
堪循吏傳默守太玄經正恐聲聞酒令人醉不醒

寄仲馮

府掾西曹貴星華使節雄我行千里鎬即敎百餘戎

原注

匈奴傳有
百餘戎

王畧持籌內邊山聚米中因成率然勢不陳取

奇功

夏木聞禽

愛此南軒木親聞好鳥聲夏陰雙綠縹幽韻獨淒清帶

霧知天曉因風覺晚晴忘機是幽客相見不相驚

挽盧通議

射策蘭成歲歸全韋相年聰明百齡事冠帶五朝賢賜
几元知止臨雍尚缺然秋風正搖落哀挽向新阡

山東推望族泉室閔歸真善政餘談舌清風在縉紳薤
晞無復露草弱漫棲塵賴有傳家慶光華列世臣

唐參政挽詩

天奪悲楊綰人亡愴魏公終疑仁者壽尚想直臣風聽

履餘榮在牽裾舊事空惟應司隸姓更使世知忠
倮先言路經綸重鼎司武文兼二允愛直見雙遺無
復靈臺論空傷薤露詩邢山向鄭國千古意同悲

挽馮當世母朱太君

郡封家邑盛羹遺主恩頻所以令勤貴由來得孟鄰文
軒空舊事弔鶴怪來嬪搖落千山暮陔蘭不復春

躬績維公父平反在不疑榮兼綵衣養孝著白華詩
黃髮全天壽遺風盛女師畫輶丹旄遠寧記鹿車時

挽王正仲母永壽太君

天錫期頤壽思疏石窳封母儀兼事事子貴亦重重歸
旄滄江水新阡翠嶺松曾參無所係不待祿千鍾
平日南陔養諸公為美談兒啼因戲綵羹遺復調甘盛
事一知十修齡百與三青烏傳吉卜喬木藹相參

濮王任夫人挽詞

思齊疏慶族聖善積慈恩子貴哀榮在舟移謦欬存緇
謳悲薤露象服照魚軒惟有秦原望東西見寢園

挽韓侍郎夫人范郡君

名卿俱令族慶善集清門珮玉師柔訓稱詩得婦言已
嗟封馬鬣不待歸魚軒從此公侯事淒涼屬采蘋
夫尊因受郡子貴亦通朝象服違偕老幽宮不復朝長
川空滾滾落葉自飄飄哀挽青郊道悲風送大招

西戎

原註時元
昊始死

旄頭占虜候鳴鏑射單于哀死知明主和親愧腐儒邊
鋒少南牧天馬自東趨看撤山西戍無勞議遠圖

晚過西湖

落日微雨好浮雲近水多空濛
亂林樹涵泳著星河賞極興不
盡跡歸心更過猶須明月夜濯
足弄金波

泛舟西湖

靡盬蘋萍合蝨緣島嶼深操舟
非有術鑒水會清心老樹成重
蓋初荷散萬簷名園皆有主費
日試幽尋
懶意適自強舊游疑觸新如從
剡溪客忽晤武陵人
鐘磬高低寺漁樵來去津涼風
水雲合天半是魚鱗

鄭侍郎挽詞

置驛無留客名卿擬上公應惟泣遺愛競欲頌寬中賜
履靈臺隔開阡夢澤空秋音送歸旄依約認樵風
治獄餘陰德哀矜出片言千金無重比駟馬見高門星
落林烏暝愁悲薤露喧江風傷遠目楚些一招魂

送張六入浙東

君侯曾一仕已作葉官歸又欲過吳市還愁脫賜衣春
風解冰雪澤國盡芳菲相望不可及孤雲天外飛

上清宮花木自夏及秋相續

信此神仙地經時玩物華殘紅未零落暗紫續矜夸掃
石分文繡開林碎晚霞秋風蘭菊茂此去有黃花

將去上清宮題梧桐

舊日見春華圓陰羽蓋斜野軒何必掃小徑故從遮秋
氣先摧葉春風別有花野夫心好靜異日到山家

九日

九日秋簫瑟登高亦少歡黃花宜澹泊碧樹早凋殘醉

舞烏紗落彈歌短劔寒可憐西北望白日遠長安

九日寄江北兄弟

登高雖有興羈旅亦消魂插鬢茱萸細題詩蟋蟀喧黃
花一樽酒斜日最高原回首江天迥翩翩塞鴈翻

張比部景真挽詩

理輪負壯志持節向炎墟反戶驚殊俗彤檐宜定居跼
爲愁瘴霧斷鴈哭來書天理真冥漠誰能問太虛

五嶺瘴癘地宦遊前事存求爲勾漏令臥念少游言夫

子獨不返壯心誰復論淒涼大招賦不見入修門

蘇度支挽詩

翰墨兼能事功名自壯圖雲霄曾幾許意氣即通衢埋
玉情何已修文理不誣敢忘徐穉禮絮酒望江湖

前年伯鸞死卜葬近要離今日延陵墓仍書季子碑人
琴俱已矣林壑助悽其心許千金劍終當挂樹枝

建功挽詩

燕祺歡受福陽祿痛離災昨土乘初載賓天遽不回弄

璋迷夢幻壯髮變塵埃唯有華封祝能寬上聖哀

題魯氏老檜堂

當日山林客移根近小軒樹陰今百世人世亦曾孫
堅節寒逾甚清風老更存猶餘雙白鶴終戀主人恩

柏悅堂

往說齊侯寢此堂申甫餘千齡畏秀聳衆木既消除
杖履每多興冰霜深自如涼風破蒸暑真賞復誰須

華堂柏兩株清景喜多餘密影隨步武涼風自掃除
蒼

顏師尚父勁節閭相如寄謝繁華子榮枯可立須

夜涼

稀星映斜漢孤月靜前軒意喜涼風過遙看碧樹翻勞
生共裘葛辭袂愧田園高枕息羣動吟蛩依草根

自蔡河之陳州

扁舟去鳬鴈川路正龍蛇日色暝如午風烏端復斜漸
漸過隴麥短短被堤花涕淚元無極那堪視物華

重傷胡二

逝水竟不復死生嗟可憐所思今已矣歸使一悽然尚想
飛鳧寫終辜憶戴船神交如有驗會付廣陵絃

五龍井禱雨

湯年不過此丘禱亦何頻石井無多水泥蟠詎有神舞
雩聲寂寞剪爪事酸辛萬古為霖意長嗟傳野人

苦寒

苦寒殊不意衰老若為謀賜隔青綾被貧餘白麝裘蟄
龍才自脫過鴈可深憂靳靳西顧日墻陰肯為留

秋過薦福院竹亭

入秋纔一到風物已淒涼舊篠全侵席新梢亂出牆蕭蕭
吹葉雨稍稍墜枝霜為有留人意嘉遊不可忘

開門金瑣碎遶逕碧檀欒鐘呬風餘韻房櫳日暮寒老僧
長入定好鳥故相看何事扁舟客殷勤覓釣竿

濟川亭

誰謂此池小遠將天漢通分明涵列宿迢遞引來風松
竹凌虛碧軒窓倒影紅高明推李杜不負傳巖功

自倚杖九節時攜書一通石橋照影水竹檻納涼風高柳
參天碧新蓮映日紅由來帝何力況數濟川功

曬書

幽事隨時有移書曬日華囊開魚蠹字眼暈石榴花病
忘多三篋勞心愧五車賜書仍有品前輩羨吾家

夜過曾孚先

索我形骸內從君里巷居度阡仍越陌酌醴更焚魚殘
雪春泥熱青燈缺月初誰能憚乘興歎息歲將除

將赴官廬州寄張四隱直二首

素放監衛州鹽倉
不應赴官廬州詩

題疑有

脫誤

一為彈冠仕遂廢東臯田不至二千石行登四十年羈
遊無定許鬢髮欲蒼然萬里南江路春風棹客船

江路西南永風波歲月淹賴君同此役久客復誰嫌榜
叟誇忠信津童識孝廉雲山仍在眼詩興力能兼

賀隱直

舉國皆儒服吾人智有餘焚舟濟河後埋劍發硎初天

路騫黃鵠雲濤縱巨魚殷勤故人意青眼看鄉書

送隱直歸扶離

原註隱直近樂南
宗法故求句及之

羈旅自無友非因七不堪逃空見人喜失學向君慙貧
病意不展滯留情未甘相從欲有問空法本傳南

雪中憶隱直

北風吹朔雪遙想度關西覆閣眠初熟登樓望獨迷巧
粧梅意密偏壓柳條低竟日思君飲空憐駿馬蹄

哭張隱直

結友兒童歲對門兄弟辭存亡殊不意晚暮可勝悲
宰木歸吳遠輶車出劔遲善人鮮百福神理儻吾欺

二星占使者九折見忠臣白髮猶強力青雲早致身
勞生真夢寐過事悉埃塵已矣寢門淚石交兼懿親

彭城集卷九

欽定四庫全書

彭城集卷十

宋 劉敞 撰

五言律詩

占晴

南國無全臆江天可喜晴
山林開雪色鳬鴈與風聲
春物催羣動年華強旅情
無人同此酒歎息滯蠻荆

蒸濕何由解喧和自不禁
片雲常蔽日小雨不成霖
蚊

蟆睛明地蛟龍老病心雄風不易得無處可披襟

雪晴

山雪喜初霽意行因肆觀巖光花半散峯勢玉新攢
鳥去樹冰落水來溪舍寒還愁向融散立到夕陽看

還郡寄洛中諸賢

雖勤車馬役而與故人同濯熱宜清洛忘饑為碧松御
風思禦寇縮地憶壺公待我成仙術相過豈有窮

送江淑寺丞棄官歸江州

時事不可願還家方自由看山一長嘯飲水亦消憂林
竹通鄰里陔蘭潔膳羞還將計然策江上倚扁舟

霍邱謝令寺丞

明府雙飛鳬南歸鴻鵠俱東風解冰雪春水渡江湖光
祿詩為樂淵明酒自娛公田皆種秫三徑更何須

送王肅侍禁新安監酒

丹穴鳳皆好藍田玉自溫流傳洛生詠歎賞貴公孫好事
欲成癖著書經閉門看君桂枝擢祿仕復誰論

山寺

疊嶂橫秋水招提隱半峯
白雲迷到路曉日自鳴鐘
法會樵漁熟齋時鳥雀慵
試尋方外士繫馬就長松

畫雪扇子

灑落瑤花薄蒼茫殺氣深
因風驚拂面濯熱幸開襟
夜色非關月朝雲不待陰
秋風來應起好在郢中吟

曉起東園

禽鳴知欲曙野客自晨興
春草生三徑朝光下九層
園

林間圃老笋蔽待巖僧即此甘幽屏趨時要未能

古檜亭

散櫟厭為社枯梧非有神一身具松栢千歲作秋春風
影日亭午露香宵向晨唯應仙鹿跡不悔白頭新

昔聞上昇檜傳作亳宮神念此亦千載玩之經一春涼
蟬號永晝獨鶴起清晨誰與畫屏幃長令水墨新

上穰亭

人世南柯夢看君葺舊居小庭長汎掃暇日省文書黑

葉生烟外黃花過雨餘
那知山谷興不向市朝疎

登樓

溪谷含冰雪川原見草芽
春生三峽水日照萬人家
時節長如此風光會有涯
唯應多美酒厭看海棠花

雨中過汜水關入鞏縣

泥塗出關惡風雨過雲寒
懸水餘百仞層峯知幾盤
攀躋頭目眩揭厲衣裳單
稍出萬山外始知人世寬

次韻謝三利涉寺見寄

衆水會蒼山僧房積翠間夕陰留到客清暑獨開關月
出亂峯白天明遊子還他時望君意餘恨不同攀

題利涉寺

原註寺有唐利涉禪師葬
塔故呂宮師相公讀書龕

雲水上方居迢迢百尺餘水光搖几席嵐翠微牕疏鶴
樹追前佛隆中問結廬已知禪寂意仍得揣摩書

哭王子直

積水忽變濁聚星無復光風流都滅盡天理竟冥茫過
事皆陳迹餘哀祇淚行遙憐轉塵柄顧影夜燈旁

卷十
衰老惜年歲羈孤慕友生一哀誰為勸百志爾無成弓
劒輕前敵詩書足自名人皆期不朽持此傲公卿

荷花

白水滿方塘荷花五月芳弄珠圓不定濯錦冷逾光香
憶風醒酒聲宜雨送涼扁舟學騷客葦室近滄浪

黃州臨臯亭

遠國江千里荒城水一涯居人愁避虎過客競乘槎秋雨
吹天暮寒濤浸日車從來遷謫地卑濕是長沙

野竹亭

勁節四時好此君常眼青影搖金破碎聲動玉瓏玲方
丈塵埃絕高齋醉夢醒由來謀野意不異在林坵

聞西戎乞降

玉關依斥堠荒服祀春秋干羽由來事桑榆尚可收發
書迎寶馬錫貢入貂裘高枕興王世吾生免外憂

冬夜賞月

暈逐陰風起光隨凜氣多霜應摧桂樹冰恐徹天河池

鏡初容鑑窻櫺亦戲磨關山千里雪此夕共金波

雪夜月中

雪霽流雲盡天虛片月升
氣清羣玉府光徹滿壺冰
過鴈明可數啼鳥寒不勝
山陰自此去野興豈難乘

玩芳亭

誰與玩芳草慨然思古人
東風千里目紅藥一城春
賀燕自高下浮雲無舊新
南山際滄海更覺爾為鄰

留別諸兄弟

羈遊路萬里物色共悽然霖雨傷秋意西南接漏天壺
公縮地遠列子御風旋信有神仙術諸公一見憐

暫之嘗上留別二兄弟

回首嗟行役吟詩愴物華西風凋木葉客子去天涯日
暮看邊鴈江秋見海槎重陽誰對酒野菊自開花

春日登樓

水國春歸晚晴樓旅望餘青絲垂地柳白朶出墻花聽
鳥參人語看雲任帽斜滄浪殊不極春色故無涯

野性耽章句春容看旅愁眼前都俗物天外倚高樓芳
草茫茫綠清淮濫濫流片雲還欲雨悵望恐花休

綠野亭偶題

記得春晚句緣情因謝公名賢共標準清境定無窮樂
矣登臨際悠然坐嘯中壺觴聊發興隨儉亦隨豐
倚郭徧禾黍安知私與公為農亦可樂遇歲不終窮累
榭白雲外壤歌明月中誰言魯酒薄自覺勝新豐

日晚步過孫監丞

夕陽喧鳥雀幽逕入蓬蒿於此興不淺行吟殊未勞市
朝移俗態麋鹿共吾曹稍稍鐘聲暝林梢白月高

望華山

原註荆華
相連也

荆山連太華青翠望難分嶺首明新旭山腰暝白雲
玉攢光自照波蕩勢成文應接寧知倦清輝遠送君

鳳翔官宅園亭

退食自閒暇空堂仍集虛秋林長費掃寒草不教鋤移
石改迂逕拂墻看舊書枝棲亦云穩何用憶吾廬

馬當山

雲壑斷無土江流橫倒山蛟涎晴出沒鳥羽倦飛還神禹
遺疏鑿天機藉險艱長風且破浪帆席慰愁顏

送畢長官

銅墨非君志仙鳧為我來三年話傾蓋十日算銜盃許
與羞垂白飛騰指上台倚門方有待未覺厭京埃

送鄭推官

此邦人事少離恨不關心頓與吾子別如何旅思深暖

風隨躍馬永路變鳴禽蓬鬢添衰白知予厭滯淫

詠雪

北風吹朔雪楚塞亦凝寒天地浮雲滿江湖行路難
醉宜乘馬出高愛倚樓看會是豐年候居人意似寬

書堂對雪

天寒不成寐看雪坐清晨默怪人聲絕都迷物態真
璇宮寒爍目琪樹靜無塵信有崑崙圃神游屬此身

和裴庫部諸家雪

侯家

裘馬寒逾壯歌鐘暝未閒
排雲朝象闕踏凍獵黃山上
客珠裝履妖姬玉綴鬟
園林通夜賞洞戶不須關

山家

雲暗峯疑斷林長路稍迷
度隅時臥鹿旁舍遠聽鷄
隱几添樵火應門倚杖藜
兒童別村至薄酒自提攜

酒家

繚徑集鉗罍江樓倚上層
青帘吹淡墨翠幕映飄燈
勸

客寒威壯歌時歲事登十千賒可不恨價仍增

獵家

寒事輕盃酒晨裝急製衣狐麋尋去迹鷹隼競橫飛沙
路濃隨馬風毛盛合圍興酣生鼻火狂發會忘歸

樵家

山木瓊瑤合溪風虎豹哀舊林迷處所破斧獨歸來世
路深泥滓生涯半死灰誰憐廊廟語正復此遺材

船家

雲白連沙渚風高雜浪花
解帆依下鴈沽酒看棲鴉
篷響投珠亂門歌墮劒斜
山陰路不遠去問戴逵家

雪後

高城催戍鼓病枕聽哀鴻
灑竹蕭蕭雪開門峭峭風
消憂罇酒綠久雨燭花紅
旅夢還知路孤舟向剡中

朔雪凍乾坤黃雲晝景昏
宿醒猶戀酒靜卧亦開門
烏鵲時時語松篁處處翻
問知淮水凍不復渡頭喧

陸子履有詩贈行次韻留別

尚白不自悟愧君稱絕倫高秋獨去國下水不留人菊
秀鴻初過魚肥稻已新淮山見明月千里最情親

留別傅欽之

驅車長值險投足正臨深白首抱壹意故人知此心巢
禽驩避弋輟鮒偶為霖去矣江湖興淒然東武吟

苦熱

炎暉不可避鬱鬱度朝晡飛鳥有時墮高林無事枯形
骸等外物橐籥任洪爐正有捐塵濁東浮萬里桴

炎暉共茲世南紀獨何偏天地大爐耳江湖沸鼎然魚
龍危失所黍稷恐無年浩蕩思雷雨長吟雲漢篇

畫鶴

置此憐神駿三年故不飛軒車寧假寵野客會忘機燕
雀那相笑鳬鷺直自肥蓬萊千萬里正想玉為衣

得楊十七書見報所居近種花木詩

堪憂雖陋巷寓興即名園似得壺公樂如吹黍谷暄艷
花爭獻笑芳草共忘言近種南軒竹春來亦有孫

眼昏

因循衰便至邂逅眼成昏稍與詩書隔初慙長老言

原註

陶淵明詩云昔聞長
老言掩耳每不喜

談空迷起滅蠅翼競飛翻懶卧稱長

策深居欲杜門

登浴室院閣

秋霽登臨好危欄百尺梯層城斜照裏雙闕五雲西
雜

樹黃映綠生煙高復低章臺少年子走馬錦障泥

稍出紅塵外方知萬象虛林端辨遠水樓角怪行車燈

續黃金像香餘貝葉書誰能損世事即地亦山居

中夜見月

月午四鄰靜高齋人寂然虛空時有警影響善驚眠宿
羽移深樹商胡慣夜船無雲更可恨珍重此嬋娟

新月

稍見桑榆上還沈河漢西氣涼知露白天闕見星低靜
色餘簾額回光射烏棲城烏偏可恨到曉不休啼

次韻和黃朝議

下武新周烈謳歌屬禹謨恭聞始元詔遠紹帝軒圖山海無加賦戎胡遂息徒英風逾草偃俯仰逮樵蘇已作華顛老欣聞紫詔新經綸兼事事哀痛及人人願輟須臾死求觀富壽民短歌隨擊壤感動不無神

傷丁元珍學士

休沐非連騎投沙迫去身似鴉憂鵬鳥化鶴望鄉人夢與江湖隔情存翰墨新定交相得晚撫事亦酸辛

喜雨

山雨來何暮高天始震雷江聲翻滌瀕水氣逼昭回灑落
芳年晚空涼醉眼開蛟龍定神宅蝸角更誰猜

漫成

經旬柳已綠過雨草齊生無事觀兒戲閒遊識鳥情看
花低帽立弄水棹舟行宦學都如夢浮生底自名

次韻和司法掾陳郭

晚得詩人賦長謠長者言坐曹涼雨過歸舍暮禽喧交
態傷貧富時情任輕軒懷歸空有夢郢路屬營魂

送慧思歸吳

塵埃十年夢江海一身歸境與夙心會事客前日非連
山橫遠勢定水湛明輝別後相望處雲孤鴈自飛

奠昭禪師

昭公不住世岑寂白蓮宮煑水終還冷浮雲本自空諸
天方丈室萬事百年翁俯仰成今昔蕭蕭鶴樹風

送僧子南

脫身游萬里空手出長安猶以抱琴樂不知行路難春

歸吳國遠水滿紫溪寒越俗今章甫疑師不著冠

宋門城下新居

頗習田野事偶居朝市間前塵應妄想舊觀輒來還甘
井如汲澗高城疑望山更憐車馬絕日在掩柴關

新居

舉世同逆旅此身那拙謀趣營容膝地適似種瓜侯藥
餌扶多病躬耕強隱憂彈冠仍應客車馬肯淹留

雪後行小園

晚照開霽色閉園幽事增樹搖風落雪池漲水浮冰鵲
亂聲已變鳶飛誰為矜風光看滿眼取醉此吾能

過丁晉公舊園

寧知陵谷變遂見曲池平喬木祇益老儲胥空復情
廢堦盈疊蘚頽樹迹微行桑霍為厚戒千秋餘歎聲

雪夜酌酒

雨雪寒休市春泥早閉門嚴城深窈窕孤月靜黃昏樓
翼此中樹高春何處村物客煩應接乘興即開樽

送雍元直使浙右

詔給四封傳自乘千里船
雲山深發興秋物正蕭然
零雨隨持節驚濤避執鞭
鱸肥稻米白勝事奈君偏

引泉

春池凍已消泉落白魚跳
石淺喧鳴玉沙虛沒暗潮
晚寒妨濯足竟日欲平橋
最愛臨波柳東風萬萬條

金鳳花

妖嬈如自媚紅白競為娛
共笑翔千仞猶疑將九雛
軒

墀蒙眊昧風雨易泥塗靜掃蒼苔地還令近酒壺

景潮亭

澤國水遙遠歸舟亭短長他方向夕景此地正朝陽物
色桑榆上風波鳬鴈行臨流問漁父好在濯滄浪

退朝觀御溝上雜花贈陸四

溝水去無窮宮花映日紅惜陰猶宿露照影獨衰翁燕
語清明外風香錦繡中為非溫室問心賞幸君同

上三山磯

江湍趨絕壁山木映雲濤野路青冥近孤舟應接勞魚
龍防碎首鳥獸幾亡曹生事垂堂戒愁心欲二毛

過龍眼磯

洪波浮一葉弱髮引千鈞虎豹公橫道蛟龍喜得人強
顏猶失色乘險屢傷神回首雙鳬翼隨波愧此身

送鄭五下第西歸

萬里河西路憐君徒步歸遊人並塞少落葉待霜飛相
得不恨晚知音深謂稀壯心須慷慨勿學淚沾衣

送人之官嶺南

過嶺幾千里孤城近海涯
地溫饒瘴毒民惡牛蠻家
并日初開市非春亦有花
知君望星斗西北認京華

和孫少述中秋

月出東山表遙思澤國秋
緣雲孤鏡上透水大珠浮
重露梧桐落微寒蟋蟀愁
我時携客飲浮白最高樓

竟夕雲四歛始知天意偏
西風不勝冷亭午更添圓
老髮緣詩苦秋懷得酒便
君居江浦上望我想依然

春日野次

溪雲晴漠漠野日晝陰陰
燕翼飛高下花房亂淺深
和風快吹面淨水喜清心
極目傷千里曾無楓樹林

南原

南原殊可望桑柘百家村
紫赤春晴氣青葱舊燒痕
遠川飛鴈驚平壤牧鷄豚
更待花如織臨高置一樽

彭城集卷十

欽定四庫全書

彭城集卷十一

宋 劉攽 撰

五言律詩

遠信

清秋萬里夢久客一封書
長日看鴻鴈呼兒問鯉魚
涼風郢路遠落葉洞庭初
無限歸鳬翼南飛最跂予

金沙花

萬弱金沙樹花奇名字珍移從今日晚恨失去年春嫩
綠藤垂架深紅棘刺人東風會入手照眼萬枝新

贈鄰翁

與彼茅茨接看渠卜築初丈人真耄矣孺子復何如翁
且勤杯酒兒教讀道書衡門來往近時為過吾廬

初晴贈某翁

雲隨夜色改日與曙光升已變前除雪猶餘北戶冰鴻
飛知適意鶴語若矜能天事寬羈旅幽人亦有朋

晨起

斷角續鳴鐘惜時春已空
曉星猶伴月早雨不禁風
眠食須頤老衣冠強自公
庭陰全綠色無復見殘紅

挽胡元夫母壽安縣太君二首

應嫗金琛社桓蘆邑致膳母儀真
盛德祿養現興門尚想君羹遺那悲
口澤存蒼山松梓暮弔鶴去翩翻

清德畏人知傳家賴母慈何時丹桂擢
相戒白華詩戲綵歡無極藏舟事密移
千鍾已不豎後日可勝悲

孟冬

十月江南暑居人尚葛衣秋花看不絕沙鳥聽忘歸氣
鬱愁成瘴霜輕嘆失威異方羈旅思歲事每多違

午睡

浮雲蔽白日風雨近秋天車馬欲安適戶庭方閒然世
塗高枕外身事曲肱前似覺松生腹迢遙不記年

古槐二首

地有藏丹井人傳不死鄉南柯經腊李黑葉勝枯楊甲

錯龍鱗斷花明鼠耳黃離宮緣望幸仙檜儼相望
仙人鍊形骨枯槁不知年秀色倏還觀陽和仍宛然今
古山川異乾坤雨露偏東陽無歇息生意會綿綿

復和前韻二首

遺履事悠遠白雲飛帝鄉潛真社寄櫟觀化肘生楊秀
葉髮垂綠雜英牙變黃犧尊與溝斷俗骨爾何望

父老見枯朽皆從童稚年孫枝復秀色仙事故依然
巢鶴千齡異源泉一溉偏頗笑海棕陋崎嶇留在縣

秋暑呈馮守

秋律何時效炎雲莫肯陰烈風長鼓鞴去水亦流金
藿食無求飽單絺不自任開懷幸寬政事省得清心

宿荆門

山行厭曲折小邑正謹譁流水纔一帶居人聚兩涯
池偏饒草木山晚聚雲霞郢路定未遠夢魂還到家

西湖水決

平原出大水蟻壤潰長汀舟楫疑藏壑波濤駭建瓴蛟

龍隨過雨魚鼈問滄溟聞道蓬萊水桑田亦屢經

素屏

陋室避塵雜深居惟此屏虛空自生白樸素擬忘形畫
手山林迹先生几杖銘長來師絕學未肯事丹青

燒殘樹

異時龍起蟄一夕烏焚巢摧落殘孤幹荒涼委近郊莓
苔深蟻穴風雨詫神文尚想知音遇空心或遠庖

避風

南風多疊浪逆水暫回船
畫鵠秋相對沙鷗靜獨眠
微明見雲樹孤絕問人煙
吾道常如此聽歌枉渚邊

同原甫詠秘閣詔藏古器圖

昔占金寶氣天瑞告成功
繪事今時絕書文自古剖
鈎記巫錦按刻異桓公
塵世無由覩崑山策府中

王廣淵郎中挽詩

家本秦川貴舊傳
淮水占省郎時望在公族
主恩兼轉燭風何急
棲塵草正纖襄陽今罷市
涕淚萬人雷

劉彞學士挽詩

傳聞四君子同是五經師獨以功名誤空思俎豆為不成
宣室召長負鴈門期賴有銘泉室千秋無愧詞

重過觀音精舍舊讀書房

往作關東客來携一束書旅人觀所主野性樂玄虛過
事都如夢精廬宛若初空憐兩蓬鬢蕭颯十年餘

過雍熙院興師房

習靜未離解悟空猶著禪齋居性所近古寺境蕭然鉗

水寒生凍爐香暝裊煙老僧眉雪白晏坐已忘年

夜雨

天暝龍蛇化風高鳥獸呼塵囂一洒盡暑病暫時蘇
火將焚野雷車若隘塗坐疑陵谷變明發蹈江湖

江上夜雨

江黑暮潮生雲深驟雨傾風波兩舟語燈火一川明
短夜苦難曙霸懷方未平空憐夢中路依約盡歸程

慶壽挽詩二首

史占書五鹿世德活千人孝養東朝盛徵音赤管新濯
龍虛望幸繭館不知春歷數姜任事寧如復辟辰
鹵簿嚴仙仗笳簫去掖門晝閒長樂衛春寂灞陵園壹
德詒謀地羣生顧復恩神遊餘仿像日入際崑崙

營冬二首

羈旅殊多事崩騰欲老身連年俱異邑幾地愧鄰人
板屋秦詩舊衡門泌水新何時仲長子卜築離風塵
薤草元畱徑開窗祇近簷成冬須少有為客未嘗淹朋

舊看都絕詩書牘欲嫌自知疎懶劇決意老幽潛

思歸

扁舟到北郭展履向東門不改蓬蒿陋猶憐松菊存因
秋動歸興值物愴離魂早晚城頭月呼兒坐小軒

楊花

不分春色晚楊花意氣驕吹噓輕一羽容易點層霄細
細穿簷隙姍姍學舞腰暫來幽僻地還復去人遙

移居觀音寺

棲息避城市塵埃將浼人虛空見佛性簡傲得吾真霜
過草木改齋餘鳥雀馴席門常晝閉誰與駐車輪

題陝西圖三首

干戈今日事關塞此圖看白日長安近蒼山隴坂寒由
來名百二自古有艱難指以安西道疑情意據鞍

萬里靈州地他年漢朔方山河從割棄關輔急隄防轉
益豺狼窟堪嗟禮義鄉拔胡須壯士看畫意蒼茫
河源來積石天馬涉流沙耳目成千古丹青在一涯荒

涼都護府斷絕使臣槎安得山河將收功似漢家

五月二首

五月黃梅熟江邊晝雨初鏤痕侵匣劒潤氣蠹囊書
亂恐翻銀漢喧愁洩尾閭時時雙水鳥往往上吾廬

榻移隨樹影杯側見山岑白鳥渴求水玄蟬清噪林道
書無近語天籟有遺音向北新開逕行苔過竹陰

江上雨中

江雲似無信山雨易翻盆鵬起天形黑龍驤水面渾大

舟纔弱纜孤樹小前村濯熱吾知慰風波勿重論

和王待制湘東王故苑

故園悲帝子高興復清秋密竹娟娟靜通波細細流
干戈餘魯殿池沼似滄洲魚鳥應無恨山公肯醉遊

冬暖

南瘴無消息玄冥為失威水深鴻鴈宿霜薄鷓鴣飛處
處憐喬木人人慣衿衣生涯卑濕地日飲自知機

忝官

忝官東北藩老拙復何言曹事輒付外客車稀到門臨
池看魚樂倚杖聽禽喧莫恨三年最從今長子孫

雨中

沈陰連日雨六月似高秋涼冷宵眠穩泥塗畫事休塵
昏舊銅鏡朽蠹敝貂裘賴有盈樽酒能為懶病謀

雨後

積雨黃梅後多風夕景天少陰同玉燭秋氣變薰弦
孤鳥爰居外殘雲蟠竦邊羽陵書蠹盡數怪絕韋編

欲雨

久晴驚礎潤信宿候風同仰月光如瓦燒雲色變灰謹
竈疑自得青鷁競飛來正想江南地清涼接過梅

北牕聞雨

庭梧不隱響秋入意蕭條過雨喧天籟高風會海潮寒
侵知洒近氣豁想雲遙歲晚看搖落無衣恥敝貂

雨

繁陰畫漠漠日雨暝紛紛鬪蟻仍移市乖龍亦過雲泥

塗休不出鐘鼓達相聞願得辭昏墊長風破宿氛

酴醾軒雨中二首

小雨疎陰響高風綠幕斜冷吹能却暑細滴不妨花輕
濕苔痕滑連陰草色加路長車馬少暫喜息飛沙

病身常自力杖屨及比鄰繼日傷霖雨深居若避人陰
苔無數綠秋草一番新入夜添涼冷書燈頓可親

巢湖阻風二首

重雲迷日月異縣失西東苦畏連天水何須竟夕風微

明分白鳥搖落望青楓久客嗟留滯吾生事事同
四月風猶北湖邊氣似秋天時如反置吾道信淹留望
遠還吹帽憎寒更擁裘無由開白日晦暝使人愁

安河阻風

隨湖寄漁浦村戍起孤烟水色連天黑沙禽亦晝眠
柘田春種麥客渡晚爭船盡日無他事尋村聽野泉

凝翠堂

聳聳排修竹蕭蕭拂蠹簷秋聲送涼雨晚影碎寒蟾
居

處貧非病生涯智養恬著書聊自守非欲效幽潛

留張十二宿

靜外塵土息故人從我遊襟懷已瀟洒杯酒聊勸酬大笑
呼五白浩歌遭四愁勞生如此少歎息為君留

王太傅河北閱馬

豐草河壩地平沙冀北區離宮連首舊苑半駒駉夫
子深詩者無邪頌使乎寧令漢馬少不識擊匈奴

庶幾堂

碧草衡門裏涼天過雨初驚秋數甲子隱几讀殘書近
郭多鳴鶴坳堂可釣魚異方無到客非是故人疎

歲除立春乾祐縣獻梅

除日應無歲新春不待年風光生意裏梅信客情邊冷
艷來冰谷疎風暎雪天不逢江上使相與競芳妍

挽胡太傅二首

州來推博物伯始貴中庸論道宜黃髮銘功遍景鐘龍
門餘舊客馬鬣悵新封後世瞻遺德南山萬丈峯

路車申伯去白馬庾公歸珍瘁人相弔哀歌露易晞石麟
森立木密印鐫泉扉絮酒慙徐孺回看旅鴈飛

挽西京左臧使石太保二首

勇擲諸生筆終乘使者車家聲唯孝謹將略亦詩書鶴
髮遺榮始瀧岡卜兆初謬承公叔薦曾未撤衣裾

青綬股肱守毳衣方伯監威名真落落碩望自巖巖道
遠年如待才長志尚緘家多二千石會見集門凡

挽宋司空丞相二首

斗樞齊七政，鼎鉉象三公。文武兼人際，安危注意同。規
隨餘故事，止足暢高風。他日雲臺畫，依然想寶融。
密印加泉室，哀簫去國門。降龍嚴冕服，畫鹿並車幡。山
南中興業，臧孫既歿言。定應天壤內，長與日星存。

月夜吹簫

長路見秋月，空江連夜明。吹簫不能寐，舉酒遞相傾。賈
客或垂淚，羈人多失聲。湘絃苦沉絕，曲盡一含情。

秦國公主挽詩

渭陽追舅氏
婺女嫁天孫
平日諸姑問
當時赤綬尊
烟波空北渚
荻竹自長門
後夜秦樓月
哀簫閔九原

宿峴山寺二首

睠予倦羈旅
坎壈林壑間
落日投古寺
秋蟲吟亂山
月明露已白
風定雲方還
王事殊未暇
悵茲清夜閒

蒼山若無路
落日聽鳴鐘
旁舍適眠虎
古潭微見龍
空窓向雲月
高枕聽風松
幽境昔未邁
仙游如可逢

觀虎翼士戍宜州

虎賁王爪士銅柱國南門魑魅非人境蠻夷盡鳥言瘴
烟旗燾黑霧雨劒鉞昏即路皆無色何時見北轅

再見士卒戍桂陽

驛書頻挿羽漢士遠征蠻四月天將暑三苗舊阻艱悲
笏背城邑苦霧濕關山後夜東南望妖氛翼軫間

悼楊公溫二首

得君雖恨晚白髮幸前期分手遂陳迹晤言成獨悲隙
駒得未久風燭不勝危詎有修文選高天可易知

寄書曾未報題墨宛如新長路歸丹旌孤兒泣畫轡
江湖餘氣概星月聚精神冥漠九原上空將萬鬼鄰

秋懷二首

搖落看秋色淹留倦郢城登臨想自昔風土最含情白
露黃橙熟清風綠桂生異鄉隨衆醉須爾析朝醒
蒹葭晚已變天宇向來高風露一瀟洒江湖久鬱陶鱸
魚越人膾白露廣陵濤歸興憑三鳥悲秋嘆二毛

夕霧

日落山氣改汀洲寒霧生深沈轉墟落迢遞失重城樹
裏迷人語沙頭見火明商帆宿何處髣髴棹歌聲

簽判承議携官酒并具殽炙晚飲檜下二首

煩攜光祿酒愧舉使君觴伏盡轉秋熱月明纔夜涼暗
蛩聲蕊蕊古檜影蒼蒼衰老淡薄味殽蔬猶徧嘗
風月近秋好君來蒙十觴塵勞我休息炎暑此清涼
玉露衣襟爽金波鬢髮蒼知心一為足何必似原嘗

送儀父清溪縣丞

雖方六七十皆有萬千家贊府亦製錦到宮殊及瓜
山苗甘筍歛溪鮓飽魚蝦為爾傳清白遺黎每歎嗟
次韻和周承議登仙源宮樓

屏星駐真境喬木盡蕭森野曠日偏永山寒雲更深
九皇容盡信萬事盛來今回首靈光殿飛鴉起暮林

送從兄思甫尉富陽

南州吏數千尉事獨神仙平日稀將鼓端居數醉眠
潮聲雷出海山色劍橫天會盡登臨興淹留肯計年

送劉誼先輩尉涇縣

原註先輩補監生
予定為第三人

詔除芸閣吏名屬太常書高第余無愧同宗誰不如鄉
情歡賜服壽酒慶安輿正復秋風起滄江厭膾魚

周節推移曹州

原註此君凡
換五幕府

珠履幕中客行行亦倦游勞歌一長鋏歷聘五諸侯
捧檄為親喜問程輕旅愁遙憐在陳士無友重悲秋

送張益宣州法曹

謝守宣城句偏矜呂法曹郡齋應似舊廷掾不徒勞

東北歸流駛空虛去棹高木瓜因贈客并擇兔千毫

韓康公挽詞三首

初還丞相印併授上公封門戟交行馬衣章雜繡龍
策書休命畢拜老未臨雍遺愛無時息淒涼在輟春
八龍歸濟美四輔號無官魯衛聯三壽韋平屬二難
大勲流竹帛盛事絕衣冠今日哀榮禮賢豪共永歎
乘輿錫臨弔朝士盛班辭笳鼓千人仗輶輶數仞旗壞
梁蕭畫在藏壑說舟移無復龍淵劍空傳禹甸詩

傷王都官正卿

巍然積德門識此貴公孫譬彼芝蘭秀行看鴻鵠軒誰
令武子死無復孟嘗言寂寞總帷暝流塵空酒樽

傷胥平叔都官

欲為大招賦期子入修門昔爾南宗學慙予莊叟言清
樽湛凝綠丹旄杳飛翻晨夕高堂念此情難重論

傷楊元明都官

原註知國子書學判
吏部南曹晏相外甥

傳家推德祖似舅識劉牢刻意鴻都學精心常侍曹

萬金酬六體一字禿千豪詎有修文事蒼蒼空自高

歸鴈

楚水幾時綠歸鴻前後聞江湖久漂泊南北忍辛勤意氣融融日聲音漠漠雲青冥易凌厲沉復未離羣

雪中聞鴈

四海困橫絕經年長往來雪霜空盡力道路有餘哀水宿稻梁薄雲深羅網猜北方有殺氣緩緩及春迴

新雁

南飛洞庭鴈稍復過衡陽宇宙同為客春秋各異方
邊塵猶處處殺氣苦蒼蒼恐有傷弓翮哀鳴少稻梁

觀南戍士

膂力三軍士由來百戰經舞旗翻鳥隼疊鼓會風霆
殺氣過銅柱驩聲塞洞庭九州防盜賊儒服媿青萍

彭城集卷十一

欽定四庫全書

彭城集卷十二

宋 劉攽 撰

五言律詩

平山堂

吳山不過楚江水限中間此地一回首衆峯如可攀
俯看孤鳥沒平視白雲還行子厭長路秋風聊解顏

伯父挽詩二首

遂有終焉志纔成智者居戶庭連水竹几杖接舟輿愛
客樽中酒傳家篋裏書疏公知足計不益舊田廬

民思常在去令德久猶存慟哭新阡樹遲疑舊里門大
招聲斷絕丹旌影翩翩後日談隨會人知歎九原

挽刁景純二首

承明通佚老仁智遠歸居門下無留客燈前不廢書舞
筵交履舄倚杖及田廬以此為家事忘年八十餘

延陵君子墓南極老人星自古稱遺愛斯文重典刑一

生隆許與五福最康寧逝矣俱陳迹臨風祇涕零

挽孔經父二首

鄉里東南秀衣冠伯仲賢先鳴俱中雋競爽故無前朔
雪凋華萼炎風急逝川斗間占紫氣應復在龍淵

往昔方聞策中間五諫書直繩無廢墨利刃必投虛任
重生何薄年長恨有餘悲君雖視草不及馬相如

挽丁元珍

顏駟縻三省君山困六安宦遊俱邂逅行路正艱難去

水爭還壑凝霜苦敗蘭唯餘青簡在時為拂塵看

挽蘇明允二首

季子才無敵桓公義有餘空悲武儋石猶得茂陵書郢
路營魂遠江源氣象虛康成宜有後正使大門閭

漢儀綿蕪盛周諡竹書存益以春秋法因知皇帝尊百

年當絕筆諸子謝微言詩禮終誰及賢良萃一門

原註
蘇增

諡法又修纂
禮書成而卒

聞雷

過臘山微雨開正兩震雷漸南風土異傷早歲時催放
逐漁翁問淹留漂母哀餘寒附煙火尚有復燃灰

和孫宣德中秋不見月

便有倚天劍決雲殊細微清光自無蔽絕境轉知稀雲
重蟬時落風高鴈已飛嫦娥苦幽獨會載客槎歸

和中秋對月

星稀如有避雲卷不辭勞露已深秋白天應為月高幽
懷向誰盡詩興更何逃勿負盈樽酒須營千兔毫

十月四日離都歸陳州

南浦三篙水歸人五日糧寒沙晨起鴈古樹夜經霜久
客復去國有情知望鄉鬢毛渾欲變鳴笛不須長

去陳二首

近關蓮舍衛接浙孔違齊今日思狂簡儒生自滑稽歸
歟那愠見去矣約輕齋潁水清如鏡風波定弗迷

禮賢齊相國

原註
平仲

愛客鄭尚書

原註
崇

徐孺曾懸榻馮公

預食魚甘棠勿剪伐客館遂邱墟長缺還相語冥鴻幸

起予

端午

萬里荊州俗今晨採藥翁
浴蘭從忌潔服艾已同風
泛酒菖蒲細含沙蠅螟紅
沉湘猶可問角觔畏蛟龍

嘉祐大行皇帝挽詩十首

七月期先遠三泉異卜征
悲憂同軌事過密非人情
晚出蒼龍駕真游白玉京
稱天騰茂實厚德始能名

北發聲名遠西城劒戟銷
萬靈潛受記百獸樂聞韶
昧

谷迷升日璇霄失建杓仙遊那可問賦諷已飄飄

盛德終無逸元功孰間然啟疆神禹績著記帝虞年桑
變旋觀海弓遺杳望天霸陵無石柳不改故山川

盡禮三神事齋居五日朝綈衣仍澣濯禁籞亦芻蕘汾
水遊何往華胥夢轉遙羨藜與環堵無日不思堯

屬車全鹵簿寶玉煥渠眉萬國瞻龍翬三辰會素旗雪
迷帝鄉望風動海隅悲今日西巡守仍非八月期

清光非可望天道亦難聞策府開羣玉賡歌續慶雲一

經皆賜復九譯尚同文會盡南山竹成書紀帝墳

陵闕儼因山明中恍下天燃魚常照夜耕象自成田鴻

洞深投玉莓苔密瘞錢涕流昭德舞無復柏梁篇

帝車旋北斗馳道繞青松銀海浮雙闕虞淵頌六龍深

思傾杞國遺恨泣華封述作無憂事靈臺與辟雍

車書共文軌律度出聲身明白垂中典優容禮直臣熊

羆渭川叟風雨越裳人更想攀髯士猶知不犯鱗

哀挽千人唱崇岡萬歲居呼闡想傳警羨道法周廬晚

日塗車靜深山灌柏初谷神知有術猶欲信前書

次韻和麻直講題楊直講所種三樗樹

誰能知散木封植亦無心歲月如視蔭棲遲還息陰
官情移柳在詩興愛棠深定有歸飛翼懷音似泮林

神宗皇帝挽詩四首

制作夸三正規模壯百王自然推大畧誰得望清光
東樂來蟠木南琛過越裳白雲那可測應復向汾陽

綿宇正歡心虞韶驟遏音戴天憂杞國就日悵崦岑貫

朽三泉府方輸九牧金斯民已仁壽至理更難忱
四塞聯初郡千官僅代工舟車逾漢迹臺省變唐風賢
傑程能際戎夷率服中軒威百年在何必畫周公
晚駕嚴仙御西巡即舊都天寒餘鶴語弓墮脫龍鬚白
髮孤臣淚清湘萬里途無由宣室問回首叫蒼梧

大行挽詩二首

原註劉熙說大行云大行受大名

受名從大行復土自因山秋草龍髯墮宮煙淚竹斑不
知汲水遠猶與化人還寂寞崦嵫日空瞻咫尺顏

謳歌前授啟桑穀遂興商恭己朝無事優賢禮亦莊那
驚同軌至方奏萬年觴西望歸雲白悠悠指帝鄉

又二首

萬國依無外三登頌太平樵夫亦談道耆舊莫知兵雲
去仙鄉遠龍來寶鼎成西風動闔闔哀涕不勝情
供張連三輔梯航會九圍屬車疑晚駕清蹕望來歸草
雲淒金闕松風颺玉衣舊傳當脫躡遙見五雲飛

日晚

清秋來早晚落日正蕭然稍見林外水獨聽風際蟬牛
羊暝知道墟落遠生烟歲事看禾黍方知沮溺賢

挽杜祁公太師二首

孤童迨耆老仕郡至三公任重仍長道材全信永終時
推子房智人識伯夷風存歿哀榮禮千秋誰與同

赤舄三師貴諸公百里封舊勲兼注意餘事寄明農哀
動襄陽市悲殘鄭國春空餘靈壽賜無復見臨雍

秋雨四首

冷雨黃昏暮秋聲衆葉喧濯煩天宇闊流惡楚江渾
龜煩當道魚龍稍在門一樽聊自勸還欲笑臧孫

漠漠清秋雨蕭蕭萬宇寒蛟龍移窟宅江漢急波瀾瘴

霧深蠻洞旌旗濕漢官南征愁失道后土若為乾

原註
時方

誅湖南
蠻賊

海風吹暮雨淮上始秋聲點滴潛滋潤陰沈未放晴林
塘雲似密水鑑鏡來清無事看魚鳥飛沈體亦輕

炎天常畏酒秋興憶開觴海面孤雲黑林端一葉黃鳥

夷歌似楚村笛語如羌更覺非吾土登臨思舊鄉

有懷北歸

江漢不宜秋霸人北望愁帝鄉從此去楚水正東流
竟日悲鷓鴣長歌倚薊嶺天邊兩黃鵠那肯為人留

秘閣梅花

始知丹禁密獨見早梅新天上應常雪人間未有春
亂香交砌草疎影媚庭筠浪作瀛洲客催成白髮人

雨中晚涼

落日浮雲暝滄江雨氣來風燈殊未定洞戶故頻開秋
意梧桐急宵征蟋蟀哀客心聊洒濯天地久塵埃

始涼

秋風來幾時客病不相宜搖落令心苦虛涼益氣衰生
涯貧更拙交態卧尤知安得千金贈鴟夷與爾期

送張直溫主簿赴南陽

張君年少予冠歲聚公車留落成強什聲名就子虛穰
橙千戶富潭菊萬家居吏隱何為樂優游不廢書

黃知錄園池

劫火無遺者靈光獨歸然寒池清照日古木碧參天
細雨來幽鷺涼風急亂蟬頗知魚樂意仍得離鉤筌

游李氏園池二首

從人問喬木繫馬得名園柳帶晴先綠禽聲暖更喧
臨池照清水拂石置芳樽不畏歸侵夜嚴城未掩門
樹密渾成塢花深更有蹊來游春尚淺重到客應迷
已近無人境深憐快馬蹄風光不負約樽酒會長攜

春陰

峽雲春易雨水國暮多風
原草萋萋綠林花淡淡紅
清江晚寒外落景半晴空
物色憐新燕歸懷目去鴻

秋雨

南國秋常暑涼風起自今
洩雲無白日度夕亦層陰
搖落梧楸意蕭條蟋蟀音
窮愁抵衰病坐作老翁心

樹陰二首

清陰方丈得暑氣乍來無
塵榻從箕踞前賢亦鍛爐
晚

蟲多黑羽秋草半青珠安得遺方客玄談似給孤

避世長梧子居貧五柳生清秋葛衣薄晚日濁膠傾雨

蝶輕

原註
去聲

猶舞風蟬涼不鳴淮南搖落早倚樹不無情

夜坐

積雨凝涼氣疎林滴露華流星占使者斜漢挹浮槎喜
近天流火回看斗轉車秋風下閭闔消散萬人家

飲酒城南門贈高子中

蒼山際碧霄綠樹及山腰青靄照殘日白雲紫麗譙偶

然成勝賞長嘯隔塵鷺少駐飛鳧鳥吾無獨酌謠

酬晁單州二首

九載一相逢侵尋頭已童喜君真傲吏老我未成翁簡
易文書省悲歡酒盞空平生懷舊意盡見醉醒中

彈琴君子邑賢守智逾多不作長沙賦仍傳白雪歌解
醒應用酒成佛却須魔正買千金骨何憂驥跋跬

送呂國博知常州

計然餘半策賈子就新書屈意銀青綬之官烏隼旌丹

楓千里遠秋興二毛初最可羞晨膳蓴絲雜膾魚

李公擇自滑州移知鄂州

黃河魴與鯉不及武昌魚好去連城守翩然雙隼旗諫官仍重外天祿不成書可待三年最歸來侍赤除

朝回

朝回還閉戶講徹復觀書重祿爭消得微軀且自如俗情矜不及生理付無餘寂嘿懷張摯淹留苦魏渠

同宋次道飲王史館園

珍館掃塵埃賓堦餘綠苔涼風知廣廈清唱急行杯修
竹端藏日交流靜殷雷歡窮有餘恨不及壯年來

同韓持國飲城東俞氏園

貧家常汲汲一飲自難營不笑烹雞黍因之同耦耕林
花含秀色谷鳥變新聲歸馬無庸疾郊扉最近城

泛舟城南二首

清溪亦多曲窄地頗宜花出水游魚樂驚人白鷺斜孤
城舊郢樹三戶楚人家歸興仍風雨蕭然捲物華

風逆湍聲急雲酣雨氣豪川蛇垂飲近江鵠去飛高洗
藕還餘味操舟未覺勞蒹葭彌極望秋意晚騷騷

早行

山鳥相呼曙檣烏自指南健看帆席滿坐數舳艫銜水
闊蛟龍舞魚肥鵲鵲貪陣雲濃似墨送雨向湘潭

晚行

天闊西曛久風多客語聞九江秋落水三峽暮歸雲飲
啄鷗相並歸飛鵠不羣湘潭早搖落稍稍悵平分

次韻酬錢少卿

簿書非力學何事不窺園乘興緣心賞忘懷到酒樽露
蟬涼寂寞風葉靜翩翩少駐東方騎前盟豈可溫

送楚南

心寄江湖上樂聞遊子歸送君從此去脫葉正秋飛雲
水聊破浪風塵今振衣山僧不善飲定負蟹螯肥

送表生

巴蜀窮天險驚君便向西長年勞賈勇懸度約輕齎行

止千金子艱危萬丈梯自憐傾蓋舊即事復睽攜

送劉四收二首

四海皆兄弟吾宗如老成好書如子政飲酒勝公榮今
日鱸魚膾羨君乘興行秋風峽中度快意聽潮聲

肥水不能遠祇今行子東高秋千里月暮景一帆風時
節迎黃菊汀洲下早鴻江天多勝事無術與君同

山陽送王中甫

弱扇避風濶卑飛歲復單君行反閭闔人望接鵲鸞齊

日容臺峻書籤策府寒誰言今昔異王貢本彈冠

送某

詞曹大府掾誰謂詔恩輕遺愛念諸父司存從汝兄男
兒貴壯志子弟習家聲努力自勉勵吾衰觀爾成

送王同年殿丞知鄞縣

結愛愧同年君先予著鞭稍遷鉤盾省歷試武城弦越
嶺霞明日南溟水浸天微官等不遂欲治予猷船

江亭後池

清江長望極餘興曲池深俯視游魚族仰嬉喬木陰通
津厭離會勝地有登臨暮雨寒潮急歸飛聞水禽

送胡因甫知湘鄉縣

雲水長沙國銅章邑大夫俗傳鶚似鵬仙化爲鳧
早濕加殮飮絃歌豈壯圖洞庭見歸客書信不宜無

季夏雨過小有秋氣

雨過猶長夏秋深從洞庭江涵郭門白山到戍樓青天
意憐早濕吾謀有醉醒柴門夜不掩高枕看流星

觀雲

江上秋多雨山中畫出雲太虛終日曠疊嶂不時分半
覺蛟龍氣皆成虎豹羣微風動閭闔暫喜見西曛

山行

危塗煩側足積水向吹襟雲樹參天直風湍殷地深翠
香秋後草巧語霽來禽信美非人境無為久滯淫

泛舟

野境尋不盡幽歡良自如猶疑夢為鳥誰謂子非魚岸

樹綠已合渚蒲長且疎
逍遙此中意何減
漆園書

初夜

海氣三陰早秋宵一刻長
涼風吹樹動疎雨過雲忙
寂寂庭槐落微微逗竹香
蛩聲畏人寢故故近眠床

夜三首

積水浮南極流沙聚客亭
喧聞漁父曲秋揖老人星
初月霜華薄孤山石黛青
天高多影響髣髴見湘靈

涼風吹素月深夜欲眠時
露自入秋白漏從前日遲
河

光如劍直螢影似星移多少流年感聞蛩輒易悲
流雲卷殘雨初月淨中宵秋色河漢白涼風星斗搖暗
螢猶弈弈高樹獨蕭蕭客鬢非松柏何時得後凋

寄題康州陳氏連理木詩

陳家聚德星累世若同生天事知常象林珍獨應誠相
傳殖嘉樹不復羨名卿坐使炎荒化何如谷口耕

哭吳道粹學士

結束并州騎雍容使者車乃心長象闕稱旨得金魚熊

鳥空遺術龍蛇有識書平生一笑樂回首涕盈裾

次韻酬盛秘丞黑桃二首

度索方殊域崑崙起素封幾人曾白眼吾子幸先容
晦迹煤炰暗含滋沆瀣濃上林求異木詔使會尋蹤
春華各自媚秋實頗能殊悴貌從黎黑丹心固頑膚
榴花隨使者荔子賜匈奴寄語玄都客相疑失味腴

雨夜三首

急雨吹喬木孤燈暝小軒神傷徒隱几夢極不招魂
老

淚悲朝雉摧腸怯夜猿舊惟眸子亮一月遂全昏
孟夏樹木長夜涼風雨時明燈掃塵榻散帙坐書帷曠
野波濤合中宵虎豹悲形骸吾喪我隱几向為誰
雲閣黃昏雨風淒九月秋老便安坐久用即置書休知
命應無念虛心自不愁三年同此興中夜一燈留

季夏雨夜

烈暑殊未艾更籌初少添電光金作屋雨氣瀑吹簾巢
燕密諍語閭蛩爭出潛何由掃氛翳試使祝蜚廉

靈壁張氏園亭二首

落帆楊柳渚，步屨松竹園。叢石千巖秀，涼風萬葉翻。
主人昔傲吏，燕翼此衡門。略看題詩客，空令悲九原。
密竹換啼鳥，清池添放魚。懸藤林下坐，響石洞中居。
興趣自無盡，傳聞那得虛。如何仲長子，刻意但成書。

重到謝氏園亭寄裴博士俊叔王主簿宗傑時裴
往淮南王出京師

徘徊遠林下，幽草為誰芳。前日同游客，今朝俱異鄉。
東

風雖淡蕩陳迹似淒涼何用江千里春心故易傷

八月十五日秋分是日又社

秋分當月半望魄復宵中難得良辰並仍將吉戊同高
樓連卜夜濁酒任治顰注想乘槎客何如擊壤翁

送裴太博

萊子頭垂白斑衣歡過人官知為親屈祿足代家貧歸
鴈江南遠芳蘭雪後新仙舟興不淺致意越鄉春

夕陽

驟雨無多潤殘陽不復遲陰涼庭樹老點綴石苔滋
雀輕投地懸蟲騰倚絲林櫻供口實美味及童兒

馬氏中隱庵

千歲知名士文淵與少游平生款段馬晚歲伏波侯鄉
里足稱善功名仍可收聞君事中隱歎息此孫謀

望荆山

宿雲收疊嶺初日上危岑點點千重黛光芒一線金秋
高怨搖落野曠快登臨誰怪欣然樂山林慰此心

送李太博知梓州郫縣

亦有飛鳧舄那知蜀道難
峽山從劍盡江水向浯寬
近邑輸鹽井連城接錦官
清風足富俗唯寄七弦彈

送邵中允知華亭縣

一登文石陞立拜紫泥書
省戶方通籍絃歌想下車
飛鳧來不遠唳鶴聽何如
莫作陶彭澤田園與世疎

晦日自薦福汎舟泊女郎臺下又汎東湖

雪解寒生水平湖照眼新
扁舟徐送客絕境漸無人
逕

草芳菲淺沙禽羽翼馴佳辰數攜酒晦日已疑春

晨興

宿露寒猶重升曦旦尚昏高秋凋衆木百里見平原水
國看魚旆田收長稻孫冥山不可望那復更南轅

將遊吳中寄原父

久宦臧仲產行歌非五噫歸來問長鋏習水看吳兒弱
喪殊可恨儻來今自知江山不我厭有意卜居之

彭城集卷十二